

Carta chí ivi nacahyí Juan nuú na cúú cuéntá Jesús

Cáhan Ndióxi Juan xihín na cúú cuéntá Jesús

¹Yehe cúú u in da sacuaḥa ta cáhyí i carta yóho nu ndóhó, quiahva i na cúú cuéntá Jesús jáchi nacaxi Ndióxi ndóhó. Tá jári cáhyí i carta yóho nuú jahyi ndó jáchi mé a ndaa quíhvi ndivaha ini i ndihi ndó. Ta a juú yehe cuití va jáchi tóco ndihi na nacandaa ini ña ndaa quíhvi ini na ndóhó.

²Quíhvi ini i ndóhó jáchi ndácaan ña ndaa ini ínima ndihí ta anda ama cáa quívi coo a xihín yó. ³Ña cúní quea ña ná caja Ndióxi, tátá yo xihín Jesucristo, jahyi mé á cuahá ñamani xihín yo. Ta ná tahnda ini mé á saha yó ta ná caja mé á ña ná coo vaha iní. Ta cuu caja mé á ña yóho jáchi cúú á ña ndaa ta quíhvi ini a mí.

⁴Cájii ndivaha ini i jáchi nanditahan i java jahyi ndó ta cája na ña ndaa tá quiahva nasahnda Ndióxi, tátá yo caja í. ⁵Candehé ndo quiahva i, na cúú cuéntá Jesús. Xíca tahví i nu ndó ña ná quíhvi ini táhan í. Ta ña cáhyí i yóho co cúú á chuun saá jáchi cúú á ña sa naxini johó í janda mé saha tá nandiquehé íchi cuéntá Jesús. ⁶Ta tá mé a ndaa quíhvi iní Ndióxi náha ña mé a ndaa cája í ña sáhdá Ndióxi caja í. Ta ña nasahnda Ndióxi caja í janda mé saha cúú á ña ná quíhvi ini táhan í.

Na xíca nuu jándahvi na cúú cuéntá Jesús

⁷Níi cúú ñuyívi nandicuita cuahá na xíca nuu jándahvi na na cúú cuéntá Jesús. Ta na cán co cúní na ndicuni na ña nanduu Jesucristo in ñayivi ñuyívi yóho. Ta na cán cúú ná na tuhún ta cúú ná na co cúní táhan xihín Jesucristo. ⁸Cuéntá coo ndó ná a jándahvi na ndóhó já ná a tívi chuun nacaja ndó sahá Jesucristo. Xiní ñúhú jáxinu coo ndó chuun cája ndó cuéntá mé á já ná cuu quiahva mé á tóco ndihi ña ndítahan nu ndó ndiquehe ndó sahá mé chuun nacaja ndó.

⁹Ta ndá na quéta xoo nuú ña najánaḥa Jesucristo ta co xíca ndacú na íchi cuéntá mé á, na cán náha ña coo in nanduu na xihín Ndióxi. Joo ndá na xíca na cája na ña najánaḥa Jesucristo, na cán cúú na in nanduu xihín Ndióxi, tátá yo ta in nanduu na xihín Jesucristo, jahyi mé á. ¹⁰Ta ndá na

2 JUAN

vaxi nu ndo ta co jánaha na ña najánaha Jesucristo nu ndo já quea a ndíquehe ndó na cán vehe ndó ta ni a cáhan Ndióxi ndó xihín ná. ¹¹Jáchi tá ná jáyaha ndó na cán vehe ndó já quea in nanduu ri mé ndó xihín na ta catáhan ndó xihín ña núu cája na.

Ndíndayí Juan na cúu cuéntá Jesús

¹²Íin cuahá ndivaha ñaha cúni cahan i xihín ndo joo co cúni cahyí i ña nu ndo. Jáchi ña cúni quea saa i coto nihni i ndohó já ná cuu nditúhún yo ña ná cavatá ndivaha ini ndihí.

¹³Ta na cúu jahyi quihvi ndo chindahá na Ndióxi coo ndó jáchi mé ña cúu ña ña nacaxi Ndióxi viti. Já ná coo.